

O Andrei ma le Upu Leaga

Saunia e Julie C. Donaldson
E faavae i se tala moni

“O le a ou taumafai ia salamo, ia sili atu, ia tatalo” (Children’s Songbook, 98).

“E te manatu e te sili atu nai lo tagata uma lava aua e te le palauvave,” Na fai mai ai Nikolai i le malologa.

“E le moni lena tala,” o le tala lea a Andrei.

“Aisea la e te le faia ai se upu palauvave se tasi?

Na o se tasi? E te le oti ai lava. E palauvavale uma a isi tagata.”

Na faamimigi tauau o Andrei. “Ou te le fia faia lava.”

Sa iloa e Andrei e sese le palauvave ma e aluese ai le Agaga Paia. Na manao Andrei ia mafuta le Agaga Paia ma ia. O lea e le palauvave ai o ia.

Sa fou Andrei i le aoga, ma o le taimi nei, e na o Nikolai lava i lana vasega ono na manao e avea ma ana uo. Ae na faalavelave pea Nikolai ia te ia e uiga i le palauvave i aso taitasi. Ma i aso taitasi na faasolo ina le lava Andrei i le fai atu e leai. Ma le isi, sa fefe Andrei nei le toe avea Nikolai ma ana uo, ma o le a tuu-atoatasi moni ai lava o ia.



“Na o le fai lava o se upu palauvave se tasi,” na fai mai ai Nikolai i le tuua o le aoga. “Ona ou le toe faalavelave lea ia oe.”

Na iu lava ina matuai le lava Andrei i le faalavelave soo mai ia te ia o lea na ia faia ai se upu palauvave se tasi—o se tasi e le leaga tele.

Na lue atu le ulu o Nikolai. “Lelei, ua avea nei oe o se tasi o i matou.”

Ina ua mavae lena, na talanoa atu foi isi uo a Nikolai ia Andrei. Sa latou aai ma taaalo lakapi faatasi ma ia i le malologa. Ae o le i ai i le vaega

o uo a Nikolai sa pei o le savali atu i totonu o le one-one mimiti. O le tele lava o le tafafao o Andrei ma i latou, o le tele foi lena o lona talanoa ai ma amio e pei o i latou. Ma latou te palauvavale uma lava. E faateleina. Sa latou talie ma faatiga e le tasi le isi. Sa latou faia ni tala le mafaufau e uiga i o latou faiaoga. Sa latou feita ma amio sau a i le tele o taimi. Na amatamata lemu lava ona ita soo Andrei ma maua ai le tele ma le tele o mafuaaga e palauvave ai.

I se tasi po ina ua o Tina ma Tama, na fai ai se finauga a Andrei ma lona tuafafine matua o Katya e uiga i le faafiafiaga e matamata ai. E aunoa ma le mafaufau i ai o Andrei, na oso mai se upu palauvave mai lona gutu.

Na foliga faateia Katya. “Ou te taua ia Tina.”

Sa tamoe Andrei i lona potumoe ma ato mai le faitotoa. O le a se mea o tupu i nei tagata? Aisea na latou faaita ai o ia i taimi uma? Ina ua foi mai ona matua i le fale, na tatala lemu le faitotoa e Andrei ma faalogoina Katya ua faapea atu, “Tina, na palauvave mai Andrei ia te au.”

“O le a?” Sa faalogoina le tei o tina. “E le palauvave lava Andrei.”

Na tapuni le faitotoa e Andrei ma faapau ifo i lalo o lona moega. Sa ia mafaufau e uiga i le tele o le eseese ua i ai nei o ia talu ona amata ona ia palauvave. Ua umi se taimi talu ona ia lagonaina le Agaga Paia.

Na tootuli Andrei i autafa o lona moega ma tatalo. “Tama Faalelagi pele e, ou te faamalie atu sa ou sau ma ita. Ou te faamalie atu sa amata ona ou palauvave. O le a ou faia le mea e sili atu.”

A o tatalo Andrei, sa faatumulia lona loto i se lagona mafanafana. Mo le taimi muamua lava talu ona amata ona ia palauvave, sa ia lagonaina moni lava le fiafia. Sa ia iloa e alofa le Atua ia te ia, ma sa mafai ona ia lagonaina le Agaga Paia. Sa ia lagonaina le faamagaloga ma iloa e mafai ona ia suia ma ia sili atu ona lelei.

Ina ua uma lana tatalo, sa ia tau atu ia tina le mea moni ma faatoese ia Katya. Na maua e Andrei se lagona



sili atu ona lelei ina ua mavae lena mea. O le manaia ia o le faalogona pe a salamo.

O le aso na sosoo ai i le aoga, e lei aai faatasi Andrei ma le vaega a Nikolai. Nai lo lena, sa ia nofo i talaane o nisi tamaiti na te lei iloaina. O le a umi se taimi, ae na iloa e Andrei o le a ia maua ni uo e lelei ma fiafia ma e le palauvavale. E pei lava o ia. ■

E alala le tusitala i Iuta, ISA.

LUI O LE FMT

“O le a ou faaoga ma le faaaloalo suafa o le Tama Faalelagi ma Iesu Keriso. O le a ou le palauvave pe faaoga upu masoa” (O Ou Tulaga Faatalalelei).

I le tasi itu o se fasi pepa, tusi ai pe tusi se ata pe o a ou lagona e maua mai i upu lelei. I le isi itu, tusi ai pe tusi se ata pe o a ou lagona e maua mai i upu leaga.

Faitau Levitiko 19:12. Aisea e taua ai le faaogaina o suafa o le Tama Faalelagi ma Iesu Keriso ma le faaaloalo?

Fesili atu i se matua po o se taitai pe aisea e tatau ai ona tatou faaoga gagana lelei ma pe na faapefea ona faamanuiaina ai i latou.

Ua ou luina au lava ina ia . . .

